

PITA Napa 1

Ai koyoto epi'ehina fayahi

¹ Nani Pitaita, Yesu Kilisitohi aposolo nohuna bo, Hu'mau lele'mo eto hu'ehina. To Hu'mau lenele'mo ho ti'ehina bona'magita, lenali guna molo'ehinalo Ponitasi metoga hiti Galesia metoga hiti Kapatosia metoga hiti Esia metoga hiti Bitinia metoga hiti tili tele hite mine'ahana lenali'i fayahi ya'ma koyoto nolepube. ² Lenaliya afotifu, Hu'ma ai'a Sikalafu'uba lenele'mo etalibe luto to Yesu Kilisitohi kaga'a kehelite agoya hu emilabe luto lenele'mo'ehina. Ai golaha'a folo lepolo'ehina yauba komopatini okala hu lepololenogo minalabe luto Hu'mau afotinifu lu molo'ehinalo mine'ahanaguti lenele'mo eto hu'ehina yabe.

Hu'mamofihī lehe'mose'na'a to bati hu'ehinalo fuluna'a hiti lenalitoga minomo tito hofa talibe.

*Kokulumagu minoba minoba huse'namofihī
legeya'a geba hite lilata hilabe.*

³ Lali Sipi Boti Yesu Kilisitohi afo'afihī Hu'ma ai kumu foke ka lilune. To sipi ka'ya Yesu Kilisitohi fili'ehinaguti le'mo ho ti'ehibe. L'emo ho ti'ehibe luto komopa'a sipi huto li hokolo lu limigo kosaba komopati hiti huto hulata nohune. Huto huto minomo buto minolatanamofihī legeya'a kehelito geba huto minolata nohune.

⁴ To fili'ehinaguti le'mo ho ti'ehina'mu luto

kokulumagu amuya fe'nohi fulupa meilina'a to sibi mehilina'a to fenene mehilina'a molo lepolo'ehina yabe. To fililata'namofahi ya'ma geba hulata nohuta yamofahi minete kokulumagu tilabe luto lenele'mo babahi nohu lepalabe. ⁵ Ya huloto Hu'mau amuya'aloti haka fi lepele'ehinogo keheli amuya melete nehinogo kana'a su halina yana yupahi lenubuto bilina'mu yabe. Yamofahi li nupa huto huto lenele'mo bati hilinamofahi geba hite minalabe.

⁶ Lenali ya'mu lite lenegelo bite minelata hilo. To Hu'mau keheli'ehinogo kana'a tupa hilina yupahi keke'i luse'na'a fato fato'na guna malalina'mu yabe. Guna malalinamofahi gupisa'alo tite keke'i lite minete fa'mene lenegelo bite minalabe. ⁷ To hena'mube? Fono ka lu lepilugi kehelilo. Bona'magi goli efahi meluguti yuhufasi nelina kanagu mone laga mehilina'a hiti ni'inogo enali sibi logogu melelago ana logouba ya'ma laga mehilina'a lo su halina'mu yabe. Ya hilenogo goli efahi eto huto bati huto minalina'mu yabe. Ana suhi huto lenali Kilisitohi keheli amuya molose'na tito mino'ehina ni'igo ya'ma keke'i luse'na guna molo lepolose'nauba lenele'mo bati hilube'mu nohinogo amuya melete nehinogo Yesu Kilisitou ai nehetilina kanagu lenigitini le'mo saga huto lenofokehi luto nohinogo to fana meha'auba le'mo ho tito le'mo ho tinogo lenalitoga minalina'mu yabe. ⁸ Lenali Yesuhi meha'a bu mege'ehite sibi komopatini keheligopa hilata nehabe. To lenemehi emilata nehana yabe. Yatai kanagu ya'ma lenubutinitu ai'a

bu mege'ehite ai kumu sibigopa keheli ule'ale hite neminabe. Ya nehite lenegelo bite laga'a fato'mofahi bona'magita lenabagaguti lu huto hilata menehanamo ya'ma kehelilata nehabe. ⁹ Hena'mube? Lenali amuya mololatanamofahi lamana yauba komopatini lenubuto bilata'na yauba lenogobisalo ni'inagihe. Ya'mu lenegelo nebibe.

¹⁰ Ana lubuto bise'namofi kumu ya'ma koyapa mono ka lu huto hi'ahana bona'i enali kehelilune lite sa sa hi'ahana yabe. To ananamomu'i Hu'mau lenalitoga lenehe'mose'na lepilube lite ya'mu ka hapa'aguti lite kaga li huto huto hite melete mine'ahana. ¹¹ Enali ya'ma huto hilina kana'a sa sa hi'ahana, Hu'mau ya'ma Kilisitohi ho lifilina kana henaki yupahi huto huse kanagu huto hilibe lite sa sa hi'ahana. To Kilisitohi meha'a yauba komopa'anigu molo epalago enali ya'ma lenali kanagu yabe lite keheli'ahabe. Lenali kanagu Kilisitou huto huloto yalo keke'i luse'namofahi gupisalo tito fililina yalo ho tito sekele mamu'a lilina'mu yabe lite keheli'ahabe. ¹² Ana ka lu huto huse bona'magi enali ma lite keheli'ahana. Ya'ma sa sa hite keheli'ahana kaga enali'ani kanagu huto hilina meni'igo lenali kanagu huto hilina ni'ibe luto Hu'mau lu hokolo hu epolo'ehina. To enali lu yege he'ahana kaga lenali yatai kanagu nekehelibe. Ya'ma Hu'mau ho lifi'ehina Sikalafu'uba kokulumaluguti limito enele'mo amuya mololago enali ka lamana'a lenalitoga lite bi'ahana bona'magi Kilisito kumu lu lepi'ahana ka ni'ibe. To ana kaga agelomagi ana hite kehelilune lite sa sa hilune'mu nehabe.

Ana kaga lenalitoga huto hu'ehina ni'inagihe.

Lamana huto minaluta'mu Sipi Bouba kehe noibe.

¹³ Ya'mu komopatini li hokolo hite lenegekesa kehelilo. Kaba hu bati hite minete Yesu Kilisitou alih i huto hinogo ya'ma lusa gi lepalalina'a yalo'i geba hilete asaga'i keheli ule'ale hite fifa ilet e minalo. ¹⁴ Hu'mamofihu keheli emite minalo. Lenali koyapa'i nehite negi nete nehago lenugufa li sibina hise kapolo melete bi'ahana. Yatai ya'ma kanagu ya suhi hite meminalo. ¹⁵ Hu'mau elesa molo lepi'ehina bo komopa'agu lamana nohinagi lenali ana suhi hite komopatinigu asaga'i lamana hite mine lite bite minalo. ¹⁶ Kaga ya'ma luto no- ligo mono bukugu fayahi keye'ahanamo ni'ina: *Nani komopa'nigu lamana higo nohunagi lenali ana hite komopatinigu lamana hinogo minalo.*

¹⁷ Lenali Hu'mamofi kumu afotifu yabe lite lu emite, nunumu hite lilata nehabe. Ai loe bomale'ititihi bu goloto moneko babeyafa ni'inogo mone bo le'malina to mone bo he'mi etalina meni'ibe. Hapa'a ya huto meni'ibe. Ai asaga bona'magihi komopa'ani bu goto hapa'ani lamana huto eto huto loko hulata nohina bo nohibe. To ya nohigo lenali panana'amagita ma metoga nehana kanagu ai kumu koli hite minete keheli emite mine lite bilo. ¹⁸ Lenali koyapa'i tatatinigi lu lepi'ahana ya'ma futu'a hapa'alo mege'i melete mine'ahanogo fa'menena lolo hu'ehibe. Lenali ana hapa'amofihu nagalugu neminago Kilisitou lenali kumu mina'a sipina he'mito gulu ho lepolo'ehinamo keheli'ahabe. Ana mina'a he'mi lepolo'ehinana siliba efahi hiti

goli efahi hiti ni'ifi, o'e yana nasana mele'isi su hoto fenene hilinamo ni'ibe. ¹⁹ To lenali Kilisitohi golaha'atu mina fito gulu ho lepolo'ehina yabe. Koyapa bona'magi hetofa sipisipi yaga mone fuhe'a hena menina yaga foipana'animu su halibe lite kuguhi keye lite mamufa gilata'namofiji ya suhi hite Yesu hago lenali kumu fili'ehina. ²⁰ To koyapa'i kokulum'a'i me'i huto mehina kanagu Hu'mau le'mo ho tito ho lifigo limito bona'magihi foipana'ani'mu fili'ehina. Yanauba alih'a kanagu su halube'mu nohinogo lenali kumu yabe luto ligo huto hu'ehina yabe. ²¹ Ya huto higo lenali ai kumu kehelite Hu'mamofitoga agoya hu emite neminabe. Hu'mau Kilisitohi fili'ehinaguti le'mo ho tito sekele mamu'a emitio molo eto'ehina yabe. To ya higo lenali ananamomu'i kehelite amuya melete aitoga agoya hu emilata to fifa ilata nehana ni'ibe.

²² Lenali kaga lamanamofiji kehelilata hite mege'i malalana ni'igo lenalitoga hapa'a lana'mu luto lenalalutinighi komopatinigu faga melise lenemehatini lusiga lite epilata nehabe. Ya'mu yabe lite komopatini ai eminogo ai eminogo mu tifite minalo. ²³ Hu'mamofiji ka'a minoba minoba hu su mehalina kagauba lenali lenele'mo kosaba'i huto nohibe. Tatatigi filise'namofiji biha'a ya suhi huto ni'igopa Hu'mamofiji minoba minoba nohina bomofiji naga'a lolo hite neminabe. ²⁴ yamofiji kaga'a mono bukugu keye'ahanaya, ma ni'ibe:

Bona'i silaga'magi
kifina suhi hite nehabe.
To sekele mamu'animofiji asaga'i

ya'ma kifi muko'a suhi huto ni'ibe.
 Kifina mele'isi hosopa ilata higo
 muko'a taloto limo ito su holata nohibe.
²⁵ Ya huto ni'inaya,
 to Sipi Bomofiji kaga yauba amuya moloto
 minoba minoba huto minalina'mu yabe.
 To ana kaga ya'ma lu yege hose ka
 lamana'auba lenalitoga nehetigo ana kaga'ya
 kehelilata nehabe.

2

*Sipi Boti amuya moloto minoba minoba efahi
 suhi huto nohibe*

¹ To ya huto ni'igo lenali foipanatini asaga'i li he'milo. To faga lilatana, kenetufatini loemo minolatana, to komopatinigu siko hilatana, huli ka ai lu emigo ai lu emigo hilatana yamofiji he'mi su halo. ² He'mi su hete yagapana'i ya suhi hite lenali Hu'mamofiji hetofa kaga'muko lepesinogo minalo. To yamofiji nemebite Hu'mamofiji ka'a hiti minete hofa talabe. To Hu'mau foipana nagalugutilenele'mo gulu halibe. ³ Yana'amu mono bukugu ma lite fayahi keye'ahana ni'ibe: *Sipi Boti komopa emise'na laga'a kehelilana lenali mino bati hilabe.*

⁴ Lenali Sipi Boti mino lito buto minolata nohina efahi legi huto nohibe. Bona'magi bu ge he'migo Hu'mau keheligo mina'a hiti tigo yauba le'mo'ehibe. Ya higo lenali aitoga bite hepilo. ⁵ Ya lite nehitelenali ana suhi hite mino lito minolata nohina efahi lolo hi su helete aitoga molo emite mine lite bite tilo. Tite Hu'mamofiji Sikalafu'amofiji mono

noha'amofahi gise efapo lolo hilabe. Ya hilete ana nonugu mamufa gi emilata bona'i eto eto hite lolo hilabe. Hu'mamofahi Sikalafu'mofahi nasana kuguhi koyo emilenogo Yesu Kilisitotoga nebinogo keheli laga hilibe. ⁶ Yamofahi mono bukugu kaga lite fayahi keye'ahana ma luto ni'inamo ni'ibe:

Nani amuya kefahi mone mina'a tito ni'ina li gehe lito ale'mo'ohube.

Yamofahi le'mo eto huloto Yiona melugu efaha'a lapusanofugi bu galo.

Ai kumu keheli amuya malalanamagi enubuya mehilina'mu yabe.

⁷ Ya ligo keye'ahana'mu ai kumu keheli amuya nemalana lenalitoga yamu'i ai ana'ina mina'a minomo tito nohibe. To ai kumu mekehe-lise mine'ahana'a enali kumu mone ya'ma luto lu'ehinamo ni'ibe:

Nohi gilata bo

enali efahi ya'mu bu gago he'mi'ahana
ya'ma efapouba
lapusa lolo hu'ehina ni'ibe.

⁸ To mono bukugu fayahi mone ma luto ni'ibe:
Ana efatoti i kusulu bite
limilana'mu yabe.

To ana efapolohokete
enahalina'mu yabe.

Ana kaga keye'ahanamofahi hapa'a ya'ma ni'ibe. Bona'i enali Hu'mamofahi ka'a keheli he'milata nehana enali kusulu bite limilana'mu yabe luto lu'ehinamo ni'ibe. Ya hite bite, ya suhi hilata nehabe luto Hu'mau ya'ma lu molo'ehina yabe.

⁹ Ya hu'ehinaya lenali ya'ma lenele'mo eto hu'ehina bona'i yagi gihiti bomofiji mamufa gi emilatana bona'i lolo hite hetofa kapolo tite nupa hi'ahana bona'i to Hu'mamofiji naga'a lolo hite nehabe. Lenali kumu kehe ito metepuguti buyu huto lenele'moto hetofa fana tose'namofitoga lenele'mo molo'ehina yabe. Lenali Hu'ma ai hetofa hatofa hapa'a lu huto hinogo i futili hilabe. Ya hilabe luto lenele'mo'ehibe. ¹⁰ Koyapa'i lenali Hu'mamofiji bona'a memine'ahana. Yatai ya'ma Hu'mamofiji naga'i lolo hite neminabe. Koyapa'i lenali mino bati hite memine'ahana. Yatai ya'ma Hu'mau ginaga fi limise bomofiji komopa'agu nehabe.

Hu'mamofiji koko yagapana'a minalune

¹¹ Nigibo nalalu'nigita, nani lenegekesa lito lu lepilugi kehelilo. Lenali Hu'mau kokulumagu nohina bomofiji naga'i nehanagi ya'mu ma metoga bonoho bo suhi hite to ka'i logo lili bo suhi hite minetetini lenugufatini laga lepesilatana nohina yauba komopatini luba li emilata nasanaya he'milo. ¹² Ya nehitte Hu'mamofiji mekeheli'ahana bona'magihi komopa'ani legi mehinogo mino eto hite minalo. Ya hite nehinogo Hu'mamofiji mekeheli'ahana bona'magi kohe tete lenali kumu foipana lilata nehana bona'i nehabe lite lenifisa ite aku alahi to lenali bite folagaha'anigu minenogo to hapatini bati hinogo enali bu negenogo yata'a kehelise'na'ani he'mite lenali kumu Hu'mamofiji fokeha'a lilabe. Yesu Kilisitou nehetilina kanagu ya hilana'mu yabe.

¹³ Lenaliya, ma metoga nehana kaba bo fato fato'mofifi nehabé. Ya'mu lenali Sipi Bomofi kumu yabe lite koko'i hi epite minalo. Mone sipi gihihi bouba ai asaga kaba bomagihi enebege ligito minomo tito nohibe. Aimo agoya hi emilo. ¹⁴ To mone gamani bona'magihi agoya hi epilo. To enali lu laga hilatana keheli epilo. Ya'ma sipi gihihi bouba gamani bo'amagihi enoho lifi'ehina'a enali ya'ma foipana lolo hilata nehana bona'i enali osahi epilabe. To kaga'ani kehelite ana'ina lamana'a lite minelatana neminana bona'i enofokehi lu epalalabe luto, Hu'mau ana gamani bona'i enele'mo ho ti'ehina ni'ibe. ¹⁵ Lenali ya hilata nehana lamana'a lolo hilana yauba enabagalo hekini nolago lenali kumu negi nagi ka lilata nehana enabaga enele'mo fu li epalalabe luto ligo Hu'mau keheli molo'ehina. ¹⁶ Lenali lu laga hu'ehina kauba nagaluguti gulu ho leto'ehinamo ni'ibe lite kehelite minalo. To lenali foipana lite fala kilabe luto gulu ho lepolo'ehina ni'ifiye? O'e, ya hu lepolo'ehina yauba foipanamofifi legeya'a lolo mehilibe. Lenali ule'ale hite minete Hu'mamofifi kele kele'i hi etete minalo. ¹⁷ Lenali silaga bona kumu keheli bati hite keheli epilo. To Hu'mamofifi ka keheli nehanamagitoga komopatini epilo. To Hu'mamofifi kumu koli hite aitoga agoya hi emilo. To ma metoga gihihi bo'mu keheli bati hite minalo.

Kilisito ginaga fi limito lele'mo kohe to'ehibe

¹⁸ To lenali bona'magihi koko panana'ani nehanamagita, lenali kaba botini kumu keheli

bati hite minete ka'ani keheli epilo. To fuluna'a lepilana komopa'ani bati higo mine'ahana bona'i enalisigo meni'ibe. Enali kele'na ka lu lepilana bona'magihi ka'ani ana hite kehelilo.

¹⁹ To kaba botini lenele'mo sibina hilenogo lenali Hu'mamofi kumu lite kehelite komopatini emilete fa'mene neminenogo Hu'mau ai keke'i luse'namofiji lenugupisalo ni'igo bu goto keheliloto lusa gi lepoloto lenele'mo bati hilina'mu yabe.

²⁰ To lenali kegeiyo hite minenogo osahi lepinogomo lenagabu gise'namofiji lite enipakafa mehese minenogo moneuba kiyi'afu keke'i lu lepalalibe? Ya mehilina'mu yabe. To lenali bati hite minenogo lenebe ligilina lenagabu gise nasana li lepinogo enipakafa mehese to kosele'i melenehenogo minalo. Ya hinogo Hu'mau kehelito hetofana hu lepalalina'mu yabe.

²¹ Lenali ya suhi hilabe luto elesa molo lepi'ehinamo ni'ibe. Kilisitou ai'a ana suhi huto lenali kumu yabe luto keke'i luse'namofiji gupisalo tito minoto lenele'mo kohe to'ehinamo ni'ibe. Lenali ya hu'ehina'mu lite mege'i melete bilo.

²² Ai foipana mehuse'i to baga'aguti faga meluse'i mino'ehinamo ni'ibe.

²³ Enali huli ka lu emilago ai ka nona'a lu meepi'ehinamo ni'ibe.

To osahi emilago ai enipakafa mehose fa'mene minoto kaga'ani loko hilina bo, Hu'ma ai bati hu epololata bo, aitoga mino moloto fifa ito mino'ehinamo ni'ibe.

²⁴ Lali foipanati yauba ai gupisalo tigo ai'a he'mu kito malipu yafalo fili'ehinamo ni'ibe.

Lali foipana lilutana'mu filise bona'i suhi huto mopo mehuse'na minoto bati bati huto minolatanamofiji minete

lite hilabe luto fili'ehinamo ni'ibe. To ai fuhe'a li'ehinaloti'i komopatini le'mo kosaba hu'ehinamo ni'ibe. ²⁵ Lenali sipisipi yaga suhi hite lopi fite mine'ahanamo yabe. Yatai ya'ma lenemehatinimofiji kaba bo'a ai lenele'mo behe higo aitoga huto hite neete mege'i nemalabe.

3

Bo alobole lolo hi'aha'ina ka'a

¹⁻² To ya higo ana'magita lenali ana hite bahatinimagihi agoya hi epite minalo. To bahatinini Hu'mamofiji kamu'i mekehelise minelata nehana ya nehinogo komopa'ani enele'mo keta mehuse hilabe lite agoya hi epite minalo. Lenali ya hite mineletetini ka lu meepise fa'mene komopatini bati hinogo minenogo enali bu le-negelete Hu'ma ma'naka luto lenalitoga nominabe lite kehelilabe. To bahatinimagi ya'ma lenali komopatini gulu gulu linogo bati hite minete nehago kehelite enali komopa'ani i gelehe hite Hu'mamofiji kaga kehelite ananalo mege'i malalabe. ³ Ana'magita, lenali lenug-ufamofiji sekele mamu'a hiti nagatu le'mo bati hite okatini yigite le'mo bati hite sekele mamu'a hiti lenigi lenayapofiji helele etenogo to pesesu'i mina'a tito minenogo ananatu ikolo bilata gu'i fayaha'a hiti yamofi kumu kehe-linogo fa'menena lolo hino. ⁴ Ya nehinogo ketipa ito fuluna'amofiji sekele mamu'a yauba amuya moloto minolatanamofiji yanauba komopatinigu kikipa hoto minolatana ni'ibe. To

tafana meli'ohuta yauba ya'ma Hu'mau hapatini kehelito gelo binogo ya'ma mina'a tito minalibe lite lilabe. ⁵ Ema afeha'aga ana'magi mono kagamofahi mege'i amuya melete mineme bi'ahana enali komopa'animofahi sekele mamu'a hiti nasana'ya lite mine'ahana. Ya hilete Hu'mamofahi keheli ule'ale hite baha'animagihi keheli epite mine'ahabe. ⁶ Koyapa a'uba Selau aiya ana suhi huto baha'a Abalahahi kaga'a keheli emitio ai kumu kibina bo'ni yabe luto lu emitio mino'ehina. To lenali ana'ina bati hite lolo hite anana'mu lenelesa melinogo minalana, ya hite ai'a yagapana'a lolo hite nehabe luto lu lepalalina'mu yabe.

⁷ To bona'magita, lenali ana suhi hite lihatini hiti hepite mine lite bite minete lihatinimagihi kaba hu bati hite minete ana'ina'ya fulunaguti li epite minalo. Ana'magihi enugufa'ani amuya memolo'ehina ni'inaya aku'i enali hiti lenali bomagita hiti mino kosaba huse'na ana hite lilana'mu yabe. Ya'mu lenali lihatini kumu keheli bati hite minalo. Lenali hiti lihatini hiti ya'ma koguna ite bati hite moneko komopatini lolo hinogo Hu'mamofitoga lilete nunumu hinogo yauba fa'mene lolo hu lalibe lite ya hite minalo.

*Minoto lito hilutauba koguna bati mehinago
liginaga fise'namofahi gupisalo tilutamofahi ka'a
yabe.*

⁸ To kaga lu su hoto lu lepilube. Lenali silaga'i lenalalutinigi hiti mino moneko hite komopatini ketipa inogo ai mehi eminogo ai mehi eminogo ya nehite lenalalutinighi leniginaga

finogo minete lenugufatinimofahi lime limite minalabe. ⁹ Ana'ina foipana lelite tinogomo lenalitintigo fililata nasana foipana lelite metilo. Lenali lube laga hibe nehinogo lenaliya nona'a meepise bebe sose ka lu epilo. To lenali ana hite lusa gise ka lilabe luto Hu'mamofahi elesa molo'ehinamo ni'ibe. ¹⁰ Ya'mu mono bukugu kaga mone fayahi keye'ahanamo ma huto ni'ibe:

Mone'i enali amuya moloto minolata nohuta
 ya'mu laga epesinogo
 yatama kanagu ma metoga minete
 legelo bito minoto lito hilune,
 lite linogo
 kenetufa'anilo kaba hite minete
 foipana melilabe.

To lenabagaguti faga faga mone melilo.

¹¹ Foipana he'mi su hete
 lenemegesa hi emite
 ana'ina lamana'a hilabe.

Fulunagu nehinogo amuya melete lilabe.

¹² Sipi Bouba ai bati hite neminana'a
 enalitogago gobisa epito
 aitoga neminana'a
 ya'mu ekesa mololoto enegeba huto nohibe.
 Foipa foya lilata bona'i enali'i
 Sipi Bouba bu enogoto kosele'i hago
 megesa hu epilata nohibe.

¹³ To ya huto ni'igo lenali ana'ina lamanana bite li'ehinogo moneuba ana'ina foipa'a henabe luto lepilibe? ¹⁴ To lenali bati hite neminete to ginaga fise'namofahi gupisa'alo tilana'mu lenegelo bilo. Yamofahi Sipi Bouba kehel'i'ehinogo lenegelo bilana kehelilina'mu

yabe. To luba li huto hu lepilinaya lenali nekehelite lenelesa nelinogo afoya foya meilo. To ana hite lenuluhaya metino. ¹⁵ Komopatini nokala hite le'mo bati hilenogo Kilisitou ai pa solata sipi bo lolo hu lepeleno. Ya hilenogo ai kaga'amu komopatinitu fifa ilata nehana yana'mu loka nehi lepelenogo keta mehuse hite hapa'a lu hokolo hu lepilune lite nelite le'mo bati hite minalo. ¹⁶ Ya nehitkele'na ka lu meepise agoya hite lu enelepilabe. To enali kumu keheli sibina mehise, keheli bati hite lu enelepilabe. Ya nehinogo lenali kumu lu sibina sabana nehinogo Kilisito hiti mine melete hilana bati huto yauba bo ya'amagi enali faga fagalo bona'i enali hapa'ani huto hulenogo enubuya'ani'mu fililabe. ¹⁷ Lenali bati suhi hite neminenogo kalana'i mele lepelenogo Hu'mau kehelinogo bati hinogo yauba tilina'mu yabe. To lenali foipana nelinogo kalana'i mele lepelenogomo yauba limilina'mu yabe. ¹⁸ Kilisitou ai ana huto bo lamana'a mino'ehina bousba bo foipa'a lali kumu yabe luto fili'ehina. Ai Kilisitou asaga bona'magihi foipana'ani su halibe luto silaga bona'i foipana'ani'mu yabe luto kana'a moneko'i filigo su ho'ehina yabe. Yamofiji Hu'mamofitoga lenele'mo malalube luto lolo hu'ehina. Enali he'ahana'mu ai mega gufa'auba fili'ehinaya meha'a hetofa Sikalafu'uba le'mo mopo higo mino lito buto mino'ehina. ¹⁹ To meha'a hiti minoto filite bi'ahana'amagi naga gegisagu nehana enalitoga Sikalafu'uba ho lifigo buto limito ka lamana'a lu epi'ehina yabe. ²⁰ Ya'ma kene'magi enali koyapa'i Noau ai nagamilugu

boti lolo huto nohigo ana kanagu Hu'mau komopa'agu fulu hilibe luto komopa'ani i gelehe hilabe luto geba huto minomo tigo kaga'a kehelii he'mite pelesa ite mineme ti'ahana. Ya nehago boana'i 8, loe'asi nagamilugu nagu tite sifite mine'ahana. To Hu'mau enubuto bi'ehina'amagi enaligo mine'ahana. ²¹ Ya suhi hago luga'a ya'ma mono nagamilugu lenele'mo bati hulata bo nohibe. Mono nagami'uba mega lugufa'a kolo tanana nokala hilina meni'ibe. Lali mono nagami'i nofoloto komopati Hu'mamofitoga nomoloto ai komopatigu nokala hinogo gulu gulu lilibe luto nagami'i fololata nohune. To ya huto lubuto bilibe luto Yesu Kilisitou fili'ehinaguti aku'i ho ti'ehina yabe. ²² To ai kokulumalugu tito Hu'mamofihii yahi lamaga'aga mino moloto nohibe. Yaga nohigo agelomagi mine'ahana'a hiti to kokulumalugu enigihiti bo mine'ahanaya amuya'a hiti mine'ahanaya Yesu enebe ligito kaba hu epoloto nominabe.

4

Hu'mamofihii bagaguti kasigo kehelito minalune

¹ Kilisito ai gufa'amo keke'i luse'namofihii gupisalo ti'ehina ni'inagi lenali ana suhi lolo hite lusa lite amuya lilo. Ya nehitte ya'ma kehelilo. Moneubafi moneubafi ai gufa'amo keke'i luse'namofihii gupisalo tinogo nohilinauba foipa nasana li lalibe luto ekesa moloto minalibe luto lilune. ² To yatai kanagu lenugufamofihii enumu filatana yamofihii melise Hu'mamofihii bagaguti kaga'a kehelite ma melugu mineme bite

minalabe. ³ Afetoga ema kanagu Hu'mamofahi mekeheli'ahana bona'magi enali laga'a kehelite ana'ina lilata nehana suhi hite lenali mine'ahana yabe. Ya'mu mine'ahana yauba kosele'i mele-poho'ehina. Lenali mokolo hise nasana hiti ana'mu lenegekesa yigi yigi hite minete ekesa nagami'i nelete negi ne'ahana yabe. Ya nehithe nagami'i nose'namofahi lenegelo nebite ya'mu li nupa hite minete silaga'namu lenegelo nebite laga mehina suhi hite lenegelo bi'ahana yabe. Lugefa bu gete lipite ibe ligi abe ligi hite mine'ahanamo ni'ibe, yamofahi he'milune ya nasana li'ahana lite nehago kana'a yatama lite mine'ahanamo ni'ibe. Aku'i molo emite ya suhi mehilo. ⁴ To yatai ya'ma Hu'mamofahi mekeheli'ahana bona'i enali foipanamofahi komopa'agu sibi hapa'a fato fato'i napa hite lilete nehago to lenali enalitoga mehepise fa'mene neminago enali bu gete topa hete lenali kumu libe pigi bibe hite minelata nehabe. ⁵ Ya nehanaya lenali ya'ma beto hilo. Enali enubu hiti nehananamagi hiti fili'ahana bona'i hiti al-ihii Hu'mau enele'mo nupa huto ka foya lilina kanagu aitoga hapa'ani lu hokolo hilana'mu yabe. ⁶ Yana'mu Kilisitou buto fili'ahana'amagihi ka lamana'a lu huto huto lu epi'ehinamo ni'ibe. Henabe lutobe? Enali'ya filise bona'magi asaga'i koyapa melugu minete enubu hiti mine'ehite ya hi'ahananamofahi hapa'animu Hu'mau kehelito guna moloto kaga'animu loko hu epolo'ehina yanamagi to enemeha'ani Hu'mamofahi kapolo nebite minoba minoba minolatana nasana mone lilabe luto lu epi'ehinamo ni'ibe.

*Hu'mau guna moloto lepi'ehina'amofifi kaba
hu batihilo*

⁷ Ana'ina silaga'na su halina kana'a anasi tupa nohibe. Ya'mu lenali komopatini to lenugufa kaba hite keheli bati hite Hu'mamofitoga kaga luto loka halune lite babahi hite minalo. ⁸ Ya nehite lenemehi ai eminogo ai eminogo hite minalo. Ya'ma hilana'auba silaga'na be ligi'ehina nasana ni'ibe. Komopa'ani epilatana yanauba foipana li'ahana asaga'i enebe ligilata nohibe. ⁹ Lenali kosele'i melepehenogo bonoho bona'i ya suhi hite kehelite enebe tigite nohatinigu enele'mo melenogo tite minalabe. ¹⁰ Lenali Hu'mamofifi ka'amofifi kehelite lenele'mo bati huse'namofifi amuya fato fato'mofifi guna molo lepolo'ehinamo yanatu foya'a lelite nebinogo bona'i luga'amagihi enele'mo bati hilana yanauba Hu'mamofitogati amuya'a lepilenogo yanatu'i ana hi epalalabe. ¹¹ Luga'a enali mono ka lu huto hilanamagi Hu'mamofifi keheli lamana hilet lu epilabe. To luga'a enali bona'i enele'mo bati hilanamagihi ya'ma Hu'mau amuya epilenogo yanatu'i lolo hi epalalabe. Lenali ya suhi ma suhi lolo nehinogo Hu'mamofifi fayahuba bati huto minalibe lite kehelite ya hilabe. Yesu Kilisito ai kumu yabe luto fayaha'auba hu lamana hilibe. Yamofifi sekele mamu'a hiti fana mehena amuya'a hiti aitoga minalina'mu ya'ma minomo tito buto mino bai toto minalibe. Ma'naka.

*Yesu ai kumu luto lenagabu ginogo minete
lenipagu fuluna li huto hilo*

¹² Nigibo nalalu'nigitabe. Lenali komopa'ni lepi'ohuna lenalitoga lubana li huto hite mele'ahana'a ni'ina baga'a hiti huto hu'ehinamofiji nasana yamofi kumu lenali kosaba'i huto hu nolimibe lite lenali topa hete meminalo. ¹³ Koyapa'i Kilisito sipi keke'i luse'namofiji gupisalo ti'ehina ya'ma lenali ana hite Kilisito kumu leniginaga fi'ehina yamofiji komopa'agu mine melete minete komopatinini bati hinogo minalo. Ya hite nehinogo lenegelo bise'na'a hiti fana tose'na'a li huto hu lepinogo ana suhi huto komopatinigu ana'ina kosaba nohinogo lenegelo bite minalabe. ¹⁴ Lenali Kilisitohi gi'a kehelite minana'mu yabe lite libe kofa hibe hite mumusopa i lepelenogomo kehelinogo yauba amuya'a hiti'na lolo hite lenegelo bite minalo. Ana'ina ya hite lite li lepelenogomo Hu'mamofiji Meha'a silikeha'a hiti nohinauba lenalitoga limito minalinamofiji hapa'a huto nohibe lite lilabe. ¹⁵ Lenalitogati bo moneubafi moneuba ho filise'nafi to gumina huse'nafi to kegeiyo huse'nafi to hipa hipa huse'nafi to bona'magihi nasana'mu lubu gilipe ape nohutana'mufi ka foya li epelenogo naga nonugu keke'i lu laligihe. ¹⁶ To mone kegil'a moneuba ai Kilisitohi bona'a nehana'mu yabe luto naga'i emilenogomo ya'ma ya hu'ehina'mu kehelinogo buya'a hiti lolo mehilibe. To Kilisitohi gi'a kehelito minoto Hu'mamofiji foke ka lu emilibe.

¹⁷ Nekehelifiye? Hu'mau ai'a bona'magihi hapa hapa'anamu loko huto guna molo epalalina kana'a tupa nohibe. To bona'a lalitoga hapi fito

lilube'mu hibe. Ya hu'ehina lalitoga kohe toto
 napa huto lilina hena hilibe? Hena huto oto ka
 lamana'a keheli he'mi'ahanamagihi hena hena
 hu epalalina ni'ibe? ¹⁸ Yana'mu mono bukugu
 kaga mone fayah keye'ahanamo ma luto ni'ibe:
 Bo lamana'a
 enali foipana lilata nehana kanagu
 enele'mo bati hite enubuto binogo
 minalana'a keta higo ni'inaya,
 ya hu'ehina
 mono ka keheli he'mite minete
 foipana lolo hilata nehana
 enali hena hilana ni'ibe?

¹⁹ To ya hu'ehina Hu'mau lu kehelinogo bati
 hulenogomo keke'i luse'na'animofhi gupisalo
 tilana bona'i enali komopa'ani'ya le'mo huto
 hulata bo Hu'mau ai'a ligo amuya mololata bo-
 mofhi kaga'amu fifa ite kaba huse'nagu mine lite
 tite lamana hite minalabe.

5

Mono kaba bona'magahi foya'ani

¹ Lenali mono'i kaba bo nehana lenali'i nani
 ana huto kaba bo lenalalutinifita ka nolepube.
 Nani Kilisito ai kumu keke'i luse'namofhi
 gupisalo tito mino'ehina yamofhi nubu'niloti
 bati huto bu go'ohuna yabe. To nani ana huto
 ai fana meha'a alahi huto huto nohinogo ana
 fana meha'agu minaluna'mu yabe. Nani ya huse
 bomofita lenekesa lu hokolo huto lu nolepugi
 kehelilo. ² Hu'mamofhi naga'i enali sipisipi
 yagamagihi suhi hite nehanamagihi lenali kaba
 hi epalalabe luto lu lepi'ehinagi ana lili'nalo

babahi hite minalo. Komopatinigu bati mehinogo kaba bati hite hi epalalana'a meni'ibe. Hu'mau lu moloto lepi'ehina suhi hite komopatinigu keta mehuse bati hinogo kaba hi epalalo. Ya nehinogo moni fe'nohi lilata nehana ya'mu gopa lili'na'a yamofahi lenuluhaya netinogo ete minete lite hilabe. ³ Ya nehitte sipi bo'ani lolo hila ya hila mehilo. Ya'ma bonatini kaba hi epalana'amagihi lenali legeso hite enali hiti koguna ite minalo. Hu'mamofahi naga'i sipisipi yagamagihi enele'mo kohe tete ai'a kagu kehelite ineme limite minete ya hite minalabe. ⁴ To minoto kaba bo Sipi Bouba nehetito sekele mamu'a hetofana ni'ilina yanamofahi fana tose'na'a sipi'a amuya moloto minolatamofahi yana'a ifi to lepelenogo minalabe.

⁵ To neheya kola bo lenali ana hite olopa bomagihi agoya hu epite limite minalabe luto lu nolepube. Ya nehitte lenali asaga'i lili'namofahi kibi bite ai agoya hu eminogo ai agoya hu eminogo hite minalana nasana lite kele kele pana'a suhi hite minalabe. Yamofahi mono bukugu kaga mone fayahi keye'ahanamo ma huto ni'ibe: *Hu'mamofahi ai enugufa'ani lelite tilata nehana bona'i enali lukes'a'ani sigilata nohibe. To bona'i limite minana'amagihi ya'ma enele'mo hetofa huto enehe'molata nohibe.* ⁶ Ya'mu lite Hu'mamofi kumu amuya melete kaba hi etete lenugufa leelite limite lenalapusa fi emite minalo. Lenalapusa fi emite ya suhi hite minenogo ai molo'ehina kana'a hupamone nohinogo ai'a aku'i lenele'mo saga hinogo ho

tilabe. ⁷ To Hu'mau ai'a bati huto kaba hu letoto lenele'mo gu i'ehinogo ya'mu lenali ana'ina'mu lenelesa linogo lengekesa yigi yigi mehise ai lu eminogo kaba hu bati hu lepalalibe.

⁸ Lenali lengekesa keheliya ite kaba hi etete minalo. Fatehatini ya'ma Satau, ai lopi kala ya suhi huto mino'ehina kala bo mone hen'i etalufi ai hen'i etalufi luto sa sa huto bula ola huto mone le'mo sibina hilina'mu yabe ⁹ Satau le'mo sibina hilina'mu ya huto nohinagihe. Lenali ya'ma keheli ule'ale hiletetini amuya melete minete ai'i le'mo fitu fo he'milo. Ya nehite ya'ma lite kehelilo. Lenigibo lenagabo Hu'mamofahi kagu nehana noto noto nehanamagi enali eniginaga nofigo ana hite kehelite minelata nehabe. ¹⁰ To asaga lehe'malina afo'afih, Hu'ma ai'i sekele mamu'a hiti Sikalafu'uba amuya moloto minolata nohinamofahi aitoga Kilisito kumu yabe luto aitoga bu henetilabe luto elesa molo lepi'ehina bo ai leniginaga fise kana'a hupamone'isi nokehelito lenele'mo bebe soto tito amuya'auba limito lenele'mo hetofa huto amuya lapusa fi lepalalina'mu yabe. ¹¹ Yamofahi amuya'a ya'ma aitogago mele'ahana yamofahi minoto mino lito buto minalibe. Lama'naka.

Bona'i luga'amagihu keke'i lulata ka

¹² Nani kaga ya'ma Silibanuhi'ya ka lu emi emi nohugo fayah, ya'ma koyoto nolepibe. Nani ai kumu ya'ma nokehelugo nalalu'nifu lamana'a lolo nohibe. Naniya Hu'mamofahi lehe'mose'na'a kehelugo legeya'a lolo nohina ya'mu lusi kaga amuya'a hiti lu huto huto lu nolepuna'mu luto lenogo'na bito lu nolepube.

Ana lehe'mose'namofiji komopa'agu ule'ale hite minalo.

¹³ To Hu'mamofiji yagapan'a'lobo'a Bebiloni hepatoga neminana'amagi lenali hiti lenele'mo eto hu'ehina enali keke'i neli lepalago nolube. To Hu'mamofiji kagu le'mo moloto mono kumu pana'ni Maki ai hiti moneko kumu keke'i nolu lepolobe. ¹⁴ Lenali Kilisito kumu yabe luto enebe tigite minete ai soso hu etenogo ai soso hu etenogo mino bati hite minalo.

Kilisitohi li pili kete lite neminana'a lenalitoga Hu'mamofiji fuluna'auba minomo tito mineno.

**Ka Lamana'a Mono'i Lu Mu Tifi'ehina Ka
Yabe**
**The New Testament in the Benabena Language of
Papua New Guinea**
Nupela Testamen long tokples Benabena

copyright © 1982 Wycliffe Bible Translators, Inc.

Language: Bena-bena (Benabena)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-09-26

PDF generated using Haiola and XeLaTeX on 11 Nov 2022 from source files
dated 9 Oct 2020

429cb299-5ab9-51c4-8857-9de5c72f8388